

Na osnovu člana 127. stav (1) tačka n) Zakona o srednjem obrazovanju i odgoju („Službene novine TK“, broj 10/20, 11/20, 8/21, 11/21, 22/21, 5/22, 10/22, 11/22, 9/23 i 12/23), člana 81. Pravila medresa Islamske zajednice u Bosni i Hercegovini („Glasnik Rijaseta“, broj 11-12/2014) i člana 107 Pravila JU Behram-begove medrese, Školski odbor JU Behram-begove medrese je na svojoj 6. redovnoj sjednici, održanoj 20.12.2023. godine u Tuzli, donio:

PRAVILNIK

o kućnom redu u Behram-begovoj medresi u Tuzli

I OPĆE ODREDBE

Član 1.

Pravilnik o kućnom redu donosi se sa ciljem uređenja života, rada i ponašanja učenika u prostorijama JU Behram-begove medrese u Tuzli, kao i izvan njih, a pobliže određuje pitanja organiziranja života i rada učenika, pitanja obavljanja namaza, i drugih islamskih dužnosti, ponašanja u školi i internatu, u vrijeme nastave i korepeticija, pitanja održavanja higijene, života u učeničkom domu, korištenja slobodnog vremena, kao i druga srodna pitanja.

Član 2.

Pojmovi koji se koriste u Pravilniku o kućnom redu Behram-begove medrese u Tuzli:

JU Behram-begova medresa u Tuzli (u daljem tekstu Medresa) jeste odgojno-obrazovna ustanova. Medresa je škola s učeničkim domom (u daljem tekstu: internat). Internat ima muški i ženski dio. Svi redovni učenici, u pravilu, stanuju u internatu.

Prostor u kojem se odvija nastava i koji je nužno potreban za proces odvijanja nastave, u smislu ovog Pravilnika, smatra se školom.

Učenici i učenice koji su na redovnom školovanju u Medresi, u skladu sa pozitivnim zakonom o obrazovanju, u smislu ovog Pravilnika, smatraju se učenicima.

Pravilnik o kućnom redu Behram-begove medrese u Tuzli u daljem tekstu je Pravilnik.

Ulazak roditelja i posjetilaca u Medresu regulisat će se odlukom koju će donijeti direktor.

II ORGANIZIRANJE ŽIVOTA I RADA UČENIKA

Član 3.

Učenici Medrese su, u vrijeme boravka i školovanja u Medresi, dužni da se ponašaju u skladu s islamskim propisima i aktima Medrese, na svim mjestima i u svim prilikama.

Učenici i njihovi roditelji dužni su također da se ponašaju u skladu s odredbama ugovora o školovanju kojeg potpisuju roditelji ili staratelji učenika prilikom njihovog upisa u prvi razred Medrese.

Član 4.

Termini za buđenje učenika, obavljanja dnevnih namaza i drugih islamskih dužnosti, kao i termini održavanja nastave, objedovanja, korepeticija, slobodnog vremena i odlazaka na spavanje određivat će se posebnim rasporedom dnevnih aktivnosti učenika, zavisno od ljetnog ili zimskog računanja vremena, kojeg donosi direktor ili druga od njega ovlaštena osoba.

Termine korištenja bibliotekom, čitaonicom, salom za dnevni odmor i rekreaciju i fiskulturnom salom, kao i termine ostalih aktivnosti u Medresi, određuje direktor ili druga, od njega ovlaštena, osoba.

Član 5.

Učenici i učenice su dužni tokom boravka u školi imati sa sobom ID kartice koje služe za identifikaciju, a koje im izdaje Medresa.

Član 6.

Sve redovne namaze, kao i džumu-namaz, učenici su dužni, u skladu s određenim terminima, u vrijeme trajanja školske godine, obavljati u džamiji Medrese. Iznimno, obavljanje određenog namaza se može organizirati i na drugom mjestu.

III PONAŠANJE UČENIKA U DŽAMIJI MEDRESE I VEZANO ZA NAMAZ

Član 7.

Prije obavljanja namaza učenici su dužni blagovremeno izvršiti potrebne pripreme: uzeti abdest ili gusul i lijepo se obući.

Lijepo oblačenje u smislu prethodnog stava ovog člana znači da učenici na namaz ne dolaze u odjeći koja ne zadovoljava šerijatske propise za obavljanje namaza i koja na sebi ima upadljive natpise i slike.

Član 8.

Svi učenici, izuzev dežurnih učenika, dužni su namaze klanjati u džamiji Medrese. Kašnjenje na namaz nije dozvoljeno.

Član 9.

Za vrijeme obavljanja namaza prekidaju se sve druge aktivnosti u školi i internatu. Odluku o odstupanju od ovoga pravila, u izuzetnim prilikama, donosi direktor Medrese.

Član 10.

Prilikom ulaska u džamiju Medrese, učenici ostavljaju obuću u police, koje su predviđene za to, a prazna mjesta u safovima redom popunjavaju.

Član 11.

Za vrijeme boravka u džamiji treba da budu tihi, naročito od početka ezana pa do završetka namaske dove i učenja Fatihe.

Član 12.

Učenici su obavezni obavljati sve dijelove namaza (sunet, sun-sunet, farz, vitr-namaz i zikr između dijelova namaza i poslije namaza).

U vremenu između namaza učenici mogu poluglasno učiti Kur'an, klanjati, činiti neke druge ibadete, ili imati druge, u džamiji primjerene, aktivnosti, prema utvrđenome planu.

IV PONAŠANJE UČENIKA NA NASTAVI

Član 13.

U toku izvođenja nastave učenici su dužni da na časove dolaze bez kašnjenja, a da u vrijeme odmora ne prave buku u hodnicima i učionicama.

Član 14.

Odsustvovanje učenika s nastave u trajanju do jednog dana odobrava razrednik, a iz internata odgajatelj. Odsustvovanje učenika koje traje više od jednog dana odobrava direktor Medrese, a odsustvovanje u trajanju 5 radnih dana i više Nastavničko vijeće. Svako odobrenje odsustvovanja s nastave i iz internata pismeno se evidentira.

Učenik kojem je odobreno odsustvo s nastave ili iz internata javlja se dežurnom profesoru ili odgajatelju, koji to evidentira u svesku dežurstva.

Član 15.

U slučaju bolesti učenik je dužan otići ljekaru. Prilikom odlaska ljekaru učenik se, prije početka nastave, javlja dežurnom profesoru od kojeg dobija obrazac za evidenciju odlaska ljekaru. U obrazac se unosi vrijeme odlaska, povratka i dužina boravka učenika kod ljekara. Nakon povratka od ljekara pismeno opravdanje o odsustvu s nastave učenik predaje razredniku ili odgajatelju.

Ukoliko u Medresu dolazi ljekar koji ujutro obavlja preglede učenici su se dužni javiti ljekaru koji će procijeniti da li je potrebno da idu u dom zdravlja radi liječenja. Ukoliko je to potrebno, ljekar će im izdati obrazac o evidenciji odlaska ljekaru.

Ukoliko ljekar učeniku odredi višednevnu hospitalizaciju, učenik se upućuje u bolnicu ili na kućnu njegu, po odobrenju direktora.

Član 16.

Svako odsustvo s kojim nije upoznat dežurni profesor, razrednik ili razredni odgajatelj tretira se kao neopravdano, o čemu je učenik dužan pribaviti ljekarsko opravdanje, ili će odsustvo pravdati roditelj usmenim razgovorom za razrednikom.

Član 17.

Svaki učenik je dužan sa sobom imati ispravnu iskaznicu zdravstvenog osiguranja. Korištenje tuđom iskaznicom je zabranjeno i kažnjivo djelo.

Član 18.

Učenici, u toku nastave, mogu primiti posjetu samo u vrijeme odmora na za to predviđenom mjestu. O tome ih obavještavaju dežurni učenici.

Član 19.

U vrijeme trajanja nastave učenici i učenice su obavezni nositi propisane uniforme.

Član 20.

U vrijeme trajanja nastave učenik je dužan imati propisane udžbenike, sveske i adekvatan pribor za svaki nastavni predmet.

Učenik koji ne bude imao propisan udžbenik, radnu svesku ili svesku, osnovni pribor (hemijska olovka, nalivpero i slično), poseban pribor (zavisno od predmeta), smatrat će se da nije ispunio sve uslove za prisustvo nastavnom času.

Član 21.

Za kršenje odredbi iz članova 19. i 20. poduzimat će se mjere upozorenja i evidentiranja u napomenu u razrednoj knjizi, te ako učenik ustraje u kršenju odredbi i pored upozorenja i evidentiranja u napomenu, izricat će mu se odgojno-disciplinska mjera.

V PONAŠANJE UČENIKA NA KOREPETICIJI

Član 22.

Korepeticija je vrijeme predviđeno za zajedničko učenje u učionici. U toku radnog dana učenici imaju dvije korepeticije: dnevnu i noćnu.

Član 23.

Nedjeljom, kada učenici ostaju u internatu, predviđene su jutarnja korepeticija i večernja korepeticija. Subotom, kada učenici imaju nadoknadu nastave ili neku drugu aktivnost u predviđenom terminu imaju samo noćnu korepeticiju dok će se ostale aktivnosti odvijati u popodnevnom dijelu po rasporedu dnevnih aktivnosti. U protivnom, na snazi je nedjeljni raspored aktivnosti.

Član 24.

Korepeticija se, u pravilu, organizira u učionici. Ona se može organizirati i na nekom drugom mjestu i na drugi način, po dogovoru učenika s razrednim odgajateljem ili razrednikom.

Član 25.

Dnevna korepeticija počinje poluglasnim učenjem Kur'ana u trajanju od 10 do 15 minuta.

Član 26.

O korepeticiji i njenom toku se vodi evidencija u dnevniku korepeticije. U posebnom dnevniku se vodi jedinstvena evidencija o neopravdanim izostancima, a vodi je dežurni odgajatelj.

Član 27.

Za red i tišinu u vrijeme korepeticije zadužen je korepetitor, kojeg imenuje razredni odgajatelj ili aktiv odgajatelja. On vodi evidenciju o korepeticiji (evidentira nemirne i odsutne učenike, uz pojašnjenje razloga izostanka, ako je upoznat).

Član 28.

Korepetitor, ukoliko je to neophodno, može dozvoliti učeniku da izađe sa korepeticije, na kraći period, u školskom prostoru, uz obavezno evidentiranje odlaska i dolaska. Korištenje mobilnog telefonskog i drugih uređaja na korepeticiji nije dozvoljeno.

Član 29.

Dozvolu za izostanak s korepeticije daje razredni odgajatelj i to bilježi u svesku dežurnog odgajatelja.

Član 30.

Razredni odgajatelj, jednom sedmično, obavezno ostvaruje uvid u dnevnik korepeticije i o zatečenom stanju obavještava razrednika.

Član 31.

Zabranjeno je ometanje, ili kašnjenje na korepeticiju.

VI PONAŠANJE UČENIKA U INTERNATU

a) Općenito

Član 32.

Svi učenici i učenice Medrese tokom svoga školovanja u pravilu borave u internatu i dužni su u predviđenim terminima dolaziti u internat. Ukoliko to zbog objektivnih okolnosti nisu u stanju onda o tome moraju obavijestiti razrednog odgajatelja, razrednika, ili dežurnog odgajatelja.

Odsustvo iz internata bez dozvole, kao i kašnjenje s redovnog ili vanrednog izlaza u grad, nije dozvoljeno.

Član 33.

Roditelji učenika dužni su se pridržavati svoje pismene izjave, koju daju na početku godine, o dolascima učenika u internat nakon slobodnog vikenda provedenog kod kuće.

Učenici su dužni dolaziti u internat u utvrđenom terminu.

O svim promjenama, koje su u vezi sa stavom 1 i 2 ovog člana, roditelji su svaki puta dužni obavijestiti razrednog odgajatelja ili razrednika.

Član 34.

Učenici se odmah nakon prvog školskog zvona pripremaju za dnevne aktivnosti o čijem rasporedu su prethodno upoznati.

Član 35.

Neovlašteno korištenje školskom telefonskom centralom i ulazak u portirnicu, kao i u druge službene prostorije, učenicima je zabranjeno. Eventualne telefonske poruke učeniku prenosi službenik koji radi na kontroli ulaza.

Član 36.

Predaja prljave i prijem čiste posteljine vrši se prema posebnom rasporedu i u terminima određenim sedmičnim rasporedom aktivnosti.

Zabranjeno je bacati otpatke kroz prozore internata ili škole.

Član 37.

Učenici i učenice se međusobno ne posjećuju u prostorijama škole ili internata.

Član 38.

Za vrijeme nastave i poslijepodnevni aktivnosti, u prostorima internata i škole, određuje se redar. Redar bilježi sva važna događanja i zapažanja u svesku redarstva.

Član 39.

Za vrijeme izvođenja nastave redarstvo obavljaju učenici trećeg i četvrtog, a u poslijepodnevnim satima učenici drugog razreda.

Član 40.

Dužnost redara je da savjesno ispunjava svoje obaveze prema uputama o dužnostima redara, koje se nalaze u svesci redarstva.

Član 41.

U prostorijama internata i škole učenici borave u papučama u kojima ne izlaze izvan tih prostorija.

Član 42.

Obuća koju oblače pri izlasku iz škole ili internata mora biti uredno složena na, za to predviđenim, policama.

Član 43.

Učenici su dužni voditi računa o inventaru Medrese kao i o racionalnom korištenju raspoloživih sredstava (električne energije i vode).

Član 44.

Za kršenje odredbi ovog Pravilnika učenik odgovara disciplinski, pod uslovima predviđenim Pravilnikom o disciplinskoj i materijalnoj odgovornosti učenika JU Behram-begove medrese u Tuzli. Za kršenje odredbi ovog Pravilnika, s materijalnom štetom po Medresu, učenik odgovara disciplinski i materijalno, pod uslovima predviđenim Pravilnikom o disciplinskoj i materijalnoj odgovornosti učenika JU Behram-begove medrese u Tuzli.

Član 45.

Svaki učenik je svom odgajatelju ili razredniku dužan prijaviti uočenu materijalnu štetu na imovini Medrese odmah po viđenju ili saznanju da je učinjena.

Član 46.

Internatski prostor se u pravilu tokom izvođenja nastave zaključava. U izuzetnim okolnostima dežurni profesor ili razrednik mogu dozvoliti boravak u internatu za vrijeme nastave učenicima koji imaju ljekarsku poštedu od pohađanja nastave, a nisu na kućnom liječenju.

Član 47.

Učenicima je u prostorije škole ili internata zabranjeno uvoditi druga lica, bez dozvole odgajatelja ili razrednika. Ukoliko se u tim prostorima uoči prisutvo stranih lica, učenik je obavezan da to odmah prijavi službenom licu u Medresi.

b) U učionici

Član 48

U učionici u vrijeme nastave i korepeticije učenici ne smiju remetiti red. U slobodno vrijeme učionica treba biti prostor koji će se koristiti isključivo za učenje.

Član 49.

Učenicima nije dozvoljeno u učionicama vršiti ličnu higijenu, čistiti odjeću i obuću, jesti, kao i pisati, vješati ili lijepiti bilo kakve slike, naljepnice i sl., bez odobrenja profesora ili odgajatelja.

Član 50.

Učenici su dužni učionicu držati čistom i urednom, školski pribor i knjige složenim, a prije napuštanja učionice svoje stolice poredati i urediti police za knjige.

Član 51.

Za vrijeme velikog odmora učenicima se preporučuje da izađu u školsko dvorište, a redari u učionicama su dužni u to vrijeme provjetriti učionice.

Član 52.

Svaki učenik je dužan paziti na pravilnu upotrebu opreme i stvari koje se nalaze u abdesthani, kupatilima i zahodima, kao i paziti na čistoću u njima prilikom upotrebe, bez potrebe se u njima ne zadržavati, niti praviti galamu.

Član 53.

Za održavanja reda i mira, te izvršavanje obaveza učenika vezanih za učionicu odgovorni su redar i rukovodstvo odjeljenja.

c) U spavaonici

Član 54.

Prostorom spavaonice učenici se koriste za odmor i spavanje i u tom prostoru se ne smije stvarati buka, ili bilo koja druga štetna emisija koja bi mogla uznemiravati učenike u sobi i van nje.

Član 55.

U spavaonici je zabranjeno upotrebljavati aparate i uređaje koji proizvode zvuk, kao i aparate i stvari koji mogu proizvoditi toplotu ili plamen, te izazvati požar, kao što su kuhalo, rešo, grijalica i sl.

Član 56.

Učenici su dužni čistiti i provjetravati spavaonice, pogotovo ujutro nakon spavanja, i druge životne prostore u Medresi po rasporedu koji utvrđuju odgovatelji.

Učenici svoje stvari drže složenim u ormarima, a krevete, kada se njima ne koriste, namještenim i zategnutim.

Član 57.

Isključivo u ormaru učenici drže uredno odloženu odjeću i sredstva za održavanje lične higijene.

Na zidove spavaonica, ormara i prozore nije dozvoljeno vješati i lijepiti slike, natpise, odjevne i druge predmete.

Član 58.

Unošenje hrane u sobe i u ormara nije dozvoljeno.

Član 59.

Učenicima je u spavaonice, a i u Medresu uopće, zabranjeno unositi pornografske i slične zapise neprimjerenog sadržaja, u bilo kojoj formi i obliku.

Član 60.

Za održavanje reda i mira, te izvršavanje obaveza učenika vezanih za spavaonicu, odgovoran je sobni pazitelj.

d) U restoranu

Član 61.

Učenici se hrane u restoranu Medrese.

Član 62.

U restoranu Medrese učenicima, osim ishrane, nisu dozvoljene nikakve druge aktivnosti, osim uz dozvolu odgovorne osobe.

Član 63.

U restoranu učenici su, pri prijemu hrane, dužni poštovati uspostavljeni redosljed, te se disciplinirano i pristojno ponašati.

Član 64.

Ponašanje u restoranu i odnos prema hrani treba da budu prilagođeni islamskim normama i bontonu. (Prije i posle jela oprati ruke, započeti Bismilom, završiti s Elhamdulillah, jesti desnom rukom).

Član 65.

Učenici hranu treba da uzimaju prema svojim potrebama, da vode računa o korištenju hljebom i da nastoje što manje hrane da ostavljaju iza sebe, kako bi se izbjeglo njeno bacanje.

Član 66.

Eventualno uočeni nedostatak u hrani učenik će prijaviti dežurnom odgajatelju.

Član 67.

Nakon jela svaki učenik je dužan upotrijebljeno posuđe i pribor za jelo vratiti na, za to predviđeni, šalter.

Član 68.

Učenicima je zabranjeno ulaziti u kuhinju gdje se priprema hrana.
Učenicima je zabranjeno, po bilo kojoj osnovi, raspravljati s osobljem koje radi u kuhinji i restoranu.

Član 69.

Iznošenje posuđa, pribora i hrane iz restorana je strogo zabranjeno.

Član 70.

Dok su u restoranu učenice, učenici u pravilu ne ulaze u restoran, niti se zadržavaju ispred njega, osim po odobrenju dežurnog profesora ili odgajatelja. Ista odredba važi i kada su učenici u restoranu.

VII KORIŠTENJE MOBITELA U MEDRESI

Član 71.

Pod pojmom mobitel podrazumijevaju se mobilni telefoni, tableti, uređaji na kojima se može koristiti internet, pametni satovi i slični uređaji.
Tokom trajanja nastave, korepeticije ili druge organizirane aktivnosti u učionici, kabinetima i svim drugim prostorima u kojima traje nastava, mobiteli moraju biti isključeni ili stavljeni na bezvučni mod, te se nalaziti u džepu za mobitele označenim sa brojem koji je identičan broju učenika u razrednoj knjizi ili drugim označenim mjestima.

Tokom malih i velikih odmora, zvučni i video sadržaji se mogu slušati isključivo pomoću slušalica, kako se ne bi ometali drugi.

Član 72.

Učenici moraju poštovati pravne odredbe zaštite privatnosti i ličnih podataka. Strogo se zabranjuje dijeljenje pristupnih podataka dodijeljenih školskih računa trećim licima. Kreiranje fotografija, zvučnih i video zapisa drugih osoba (učenika, profesora i ostalih zaposlenika Medrese) dozvoljeno je samo uz izričitu saglasnost tih osoba.

Član 73.

Profesor u toku nastave može dozvoliti upotrebu mobitela u nastavne svrhe.

Član 74.

Tokom boravka u džamiji mobiteli moraju biti isključeni ili stavljeni na bezvučni mod.

Član 75.

Kršenje pravila iz ovog poglavlja smatra se ometanjem nastave te će se poduzimati mjere upozorenja i evidentiranja u napomenu, a ako se kršenje nastavi i izricanje pedagoške mjere.

VIII PONAŠANJE I IZGLED UČENIKA

Član 76.

Svi učenici Medrese su dužni, u Medresi i izvan nje, odijevati se po islamskim propisima.

Član 77.

Prilikom nastupa u javnosti, u svakodnevnom životu, na ramazanskoj praksi i u svim drugim prilikama, učenici su dužni ponašati se u duhu islama, toleratno, lijepo i uvažavajući druge.

Član 78.

Učenici treba da imaju lijep i korektan odnos prema zaposlenicima Medrese.

Član 79.

Učenicima je zabranjen ulazak u objekte i mjesta na kojima se konzumira alkohol, ili javno čine grijesi bilo koje vrste, kao i unošenje u prostorije Medrese bilo čega što je haram.

Učenicima nije dozvoljeno da uspostavljaju kontakt i razvijaju odnose s osobama koje ismijavaju njene propise i očigledno krše zakone i javni red.

Član 80.

Pušenje u prostojima internata, škole i dvorišta je strogo zabranjeno.

Član 81.

Učenici su posebno dužni paziti na ličnu higijenu.

Lična higijena se ogleda u redovnom kupanju, pranju zuba, održavanju čistoće i urednosti svoje odjeće i obuće, u redovnom šišanju (za učenike), rezanju nokata i svemu drugom što učenika čini čistim i urednim.

Član 82.

Učenici su uvijek uredno podšišani, počešljani, urednih i pristojnih frizura.

Farbanje kose, zarezivanje i čupanje obrva, pirsing, tetovaža ili puštanje solufa učenicima nije dozvoljeno.

Član 83.

Učenicima nije dozvoljeno nositi ženski nakit: lančiće, narukvice i sl.

Član 84.

Učenicima je zabranjeno nositi tijesnu, prozirnu i nepriličnu odjeću.

Član 85.

Odjeća treba da bude prikladna, kako za vrijeme izlazaka izvan školskog prostora, tako i za vrijeme boravka u prostorima škole, internata i u džamiji.

Član 86.

Prikladna odjeća za učenike podrazumijeva: košulje ili majice bez upadljivih napisa ili ilustracija i pantalone, koje nisu preširoke, preuske i preduge.

Član 87.

Učenice su obavezne nositi propisnu šerijatsku odjeću u Medresi i izvan nje, bez upadljivih boja i krojeva. U propisnu odjeću spadaju i šire hlače. Na zahtjev odgajateljice ili razrednika učenice su dužne korigirati svoju odjeću i uskladiti je s pravilima islamskog odijevanja.

Učenicama nije dozvoljeno potpuno ili djelimično prekrivanje lica, na način da ih se ne može prepoznati.

Član 88.

Na nastavi tjelesnog odgoja učenici su obavezni na sebi imati majice i donje trenerke ili kratke pantalone do ispod koljena, a na nogama odgovarajuće patike.

Šorc se ne smatra pristojnom odjećom.

Član 89.

Pri spavanju učenici koriste pidžamu.

IX SLOBODNO VRIJEME

Član 90.

U toku dana učenici imaju svoje slobodno vrijeme.

Član 91.

Ukoliko svoje slobodno vrijeme provode izvan Medrese, učenici su dužni da vode računa o svom ponašanju, kao i o mjestima koja posjećuju.

Učenici su dužni izbjegavati svaki mogući konflikt na ulici.

Član 92.

U sali za dnevni odmor učenici mogu čitati štampu, knjige, pratiti radio ili TV-program, različite objave na internetu i sl. Pri tome treba da izbjegavaju pretjerano pojačavanje zvučnika.

Prilikom napuštanja prostorija dnevnog boravka, učenici su dužni ostaviti uredan prostor iza sebe.

Član 93.

U sali za dnevni odmor i slobodne aktivnosti učenici će se ponašati tako da ne ometaju druge učenike koji čitaju, prate TV-program, ili imaju neku drugu aktivnost.

Član 94.

U toku svojih aktivnosti u dvorištu Medrese učenici se pristojno ponašaju i svojim postupcima ne uznemiravaju druge, kako u Medresi tako i van nje.

Učenici su dužni, u okvirima svojih mogućnosti, redovno održavati čistim dvorišta Medrese.

Član 95.

Slobodne vikende, praznike i mubarek-dane, učenici provode kod kuća.

U školu se vraćaju u nedjelju poslijepodne, ili u ponedjeljak do početka nastave, o čemu odgajatelji vode preciznu evidenciju praćenu izjavom o pristanku roditelja.

Član 96.

Subotom i nedjeljom internat se zaključava 15 minuta nakon jacije-namaza, ukoliko drugačije ne odredi ovlaštena osoba.

X PRELAZNE I ZAVRŠNE ODREDBE

Član 97.

Pravilnik o kućnom redu stupa na snagu danom donošenja.

Član 98.

Stupanjem na snagu ovog Pravilnika stavlja se van snage Pravilnik o kućnom redu Behram-begove medrese broj: 01-03-101/11 od 21.2.2011. godine.

Broj: 01-02-1091/23

Datum: 20. decembar 2023. god.

Muftija Vahid ef. Fazlović,
PREDSJEDNIK ŠKOLSKOG ODBORA



